

SMK Pantai bakal laksana projek pertama Tugas Individu

LABUAN: SMK Pantai akan melaksanakan projek pertama Tugas Individu (personal project) yang menjadi salah satu syarat selepas sekolah itu diiktiraf sebagai sekolah International Baccalaureate World School (IBWS) pada tahun 2016.

Pengetua SMK Pantai, Sahar Misron berkata, tahun ini merupakan tahun pertama pelaksanaan Tugas Individu (personal project) yang dikhususkan kepada pelajar Tingkatan Empat yang menjadi satu keperluan di bawah MYPIB.

"Justeru itu satu perjumpaan khas bersama pihak pengurusan sekolah dan ibu bapa pelajar Tingkatan Empat telah diadakan bagi memberi penjelasan tentang Tugas Individu yang perlu dibuat oleh semua pelajar Tingkatan Empat" katanya dalam satu kenyataan di sini kelmarin.

Katanya perjumpaan itu yang mendapat sambutan yang amat menggalakkan daripada ibu pelajar telah diadakan di sekolah itu, pada Sabtu lalu.

Sahar berkata, ibu bapa dan penjaga pelajar perlu diberi kefahaman jelas tentang Tugas Individu anak-anak mereka supaya dapat memastikan semua tugas dapat disiapkan dalam tem-

poh yang ditetapkan.

Beliau berkata, Tugas Individu (personal project) ini membuka peluang kepada pelajar untuk menyediakan tugas berdasarkan minat, bakat, kecenderungan serta kemahiran mereka.

Katanya, setiap pelajar akan dibimbing oleh penyelia masing-masing, yang terdiri daripada guru-guru SMK Pantai IBWS sendiri.

"Setiap guru mempunyai tiga hingga lima pelajar di bawah pengawasan dan mereka diberi tempoh selama lapan bulan untuk menyiapkan tugas masing-masing.

Sementara itu, para pelajar berpeluang mengembangkan bakat dan kemahiran masing-masing sebagai persediaan menghadapi cabaran yang lebih hebat di kolej dan universiti kelak.

Turut diadakan dalam perjumpaan bersama ibu bapa itu ialah, Taklimat Personal Project Penyelarasnya, Norliallah Abdulla.

Selain itu tayangan video tentang Personal Project diharapkan memberi kefahaman dan maklumat tambahan khususnya kepada para pelajar dan para ibu bapa dan penjaga pelajar.
OLEH JAINUDIN DJIMIN



PERJUMPAAN.... Sahar (kanan sekali) bersama pelajar SMK Pantai yang diadakan baru-baru ini.